

ნთქამს თუ ნთქავს? ჩანთქამს თუ ჩანთქავს? ჩაუნთქამს თუ ჩაუნთქავს?

ამ ზმნას აწმყოს ფუძის საწარმოებელ სუფიქსად -ამ აქვს: ნთქამს, ჩანთქამს (შთანთქამს), ჩაუნთქამს (შთაუნთქამს). ეს კარგად ჩანს ამ ზმნისაგან ნაწარმოებ მასდარსა და მიმღეობაში: ჩანთქმა (შთანთქმა), ჩანთქმული (შთანთქმული), ჩამნთქმელი (შთამნთქმელი). თანამედროვე სალიტერატურო ქართულში -ამ სუფიქსი ამ ზმნაში -ავ სუფიქსმა შეცვალა და -ავ სუფიქსიანი ფორმები გაბატონდა: ნთქავს, ჩანთქავს (შთანთქავს), ჩაუნთქავს (შთაუნთქავს). -ავ სუფიქსიანი ფორმათა გაბატონებისათვის ხელი უნდა შეეწყო იმას, რომ -ამ სუფიქსიანი ფორმები დიალექტურ ფორმებს მოგვაგონებს და ასეთადაც უნდა ყოფილიყო აღქმული (შდრ. სალიტერატურო კლავს, მოკლავს და მოუკლავს და დიალექტური კლამს, მოკლამს და მოუკლამს; ხატავს, დახატავს და დაუხატავს და ხატამს, დახატამს და დაუხატამს). -ავ სუფიქსიანი ფორმები იმდენად გაბატონებულია თანამედროვე სალიტერატურო ქართულში, რომ -ამ სუფიქსიანი ფორმები ხელოვნურობის შთაბეჭდილებას ტოვებს. ამის გამო ნთქამს, ჩანთქამს (შთანთქამს), ნთქამდა, ნთქამდეს, ჩანთქამდა, ჩანთქამდეს, ჩაუნთქამს ფორმები უკუგდებულ უნდა იქნეს და ერთადერთ ლიტერატურულ ფორმებად ნთქავს, ჩანთქავს, ნთქავდა, ნთქავდეს, ჩანთქავს, ჩანთქავდეს, ჩაუნთქავს უნდა იქნეს მიჩნეული.

მასდარსა და მიმღეობაში მ-იანი ფორმები დარჩება: ჩანთქმა (შთანთქმა), ჩანთქმული (შთანთქმული), ჩამნთქმელი (შთამნთქმელი).